

# 2 YOKAANA

Essuula : **1**

## ESSUULA 1

- N**ze omukadde mpandiikira omukyala omulonde n'abaana be nze be njagala mu mazima; so si nze nzekka, era naye ne bonna abategeera amazima;
- <sup>2</sup> olw'amazima agabeera mu ffe, era aganaabeeranga naffe emirembe n'emirembe:
- <sup>3</sup> ekisa, okusaasira, emirembe ebiva eri Katonda Kitaffe n'eri Yesu Kristo Omwana wa Kitaffe, binaabeeranga naffe mu mazima n'okwagala.
- <sup>4</sup> Nsanyuse nnyo kubanga nnasanga abamu ku baana bo nga batambulira mu mazima, nga bwe twaweebwa Kitaffe ekiragiyo.
- <sup>5</sup> Era kaakano nkwegayirira, omukyala, si ng'akuwandiikira ekiragiyo ekiggya wabula kye twalina okuva ku lubereberye, twagalanenga feka na feka.
- <sup>6</sup> Na kuno kwe kwagala okutambuliranga mu biragiyo bye. Ekyo kye kiragiyo, nga bwe mwawulira okuva ku lubereberye mulyoke mukitambulirengamu.
- <sup>7</sup> Kubanga abalimbalimba bangi abafuluma mu nsi, abatayatula Yesu Kristo ng'ajja mu mubiri. Oyo ye mulimbalimba oli era omulabe oli owa Kristo.
- <sup>8</sup> Mwekuumenga muleme okubulwa emirimu gye twakola, naye muweebwe empeera ennamba.
- <sup>9</sup> Buli muntu ayitirira n'atabeera mu kuyigiriza kwa Kristo talina Katonda: abeera mu kuyigiriza okwo, oyo alina Kitaffe era n'Omwana.
- <sup>10</sup> Omuntu yenna bw'ajjanga gye muli n'ataleeta kuyigiriza okwo temumusembezanga mu nnyumba, so temumulamusanga:
- <sup>11</sup> kubanga amulamusa assa ekimu naye mu bikolwa bye ebibi.
- <sup>12</sup> Newakubadde nga nnina ebigambo bingi okubawandiikira, ssaagala kubiwandiika ku lupapula ne bwino: naye nsuubira okujja gye muli, n'okwogera akamwa n'akamwa, essanyu lyammwe liryoke lituukirire.
- <sup>13</sup> Abaana ba muganda wo omulonde bakulamusizza.

For other languages please go to [www.wordproject.org](http://www.wordproject.org)